



Broj: 04-05-4-1921/18

Sarajevo, 19.10.2018. godine

SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA
„EFIKASNOST RADA OPĆINSKIH SUDOVA“

Ured za reviziju institucija u Federaciji Bosne i Hercegovine proveo je reviziju učinka na temu „**Efikasnost rada općinskih sudova**“, sa ciljem da ispita efikasnost rada općinskih sudova u rješavanju predmeta. U okviru navedenoga cilja, ispitano je da li pojedini općinski sudovi, sa postojećim resursima, rješavaju veći broj predmeta u odnosu na druge općinske sudove, te da li se predmeti rješavaju u utvrđenim rokovima. Vremenski obuhvat revizije bio je period 2014.-2016. godina, a obuhvaćen je 31 općinski sud.

Provedena revizija je pokazala da **postoje razlike u efikasnosti rada između općinskih sudova, zbog činjenice da su određeni sudovi sa postojećim resursima rješavali manji broj predmeta, u poređenju sa ostalim sudovima.** Ukazano je na nedovoljnu iskorištenost resursa u pojedinim sudovima, te na činjenicu da su određeni sudovi kontinuirano, u dužem vremenskom periodu, rješavali manji broj predmeta u odnosu na druge sudove. U revizijskom izvještaju je konstatovano da postojeći način praćenja rezultata rada u općinskim sudovima ne pruža pouzdane informacije o stvarnoj iskorištenosti ljudskih resursa u sudovima.

Kada je u pitanju blagovremenost rješavanja predmeta, zaključeno je da općinski sudovi nisu bili efikasni u pogledu rješavanja sudskih predmeta u utvrđenim rokovima. Sudovi su kasnili u rješavanju značajnog broja predmeta, a rezultati revizije su pokazali da je u gotovo svim sudovima iz uzorka revizije, 60% predmeta riješeno sa prekoračenjem utvrđenih rokova.

Revizijom je također utvrđeno da je u nekim sudovima prosječno trajanje rješavanja predmeta bilo višestruko duže u odnosu na druge sudove. **Podaci o različitom prosječnom trajanju rješavanja predmeta između sudova, ukazuju na činjenicu da građani FBiH, zavisno od toga na kojem sudu rješavaju svoj predmet, nemaju iste mogućnosti da brzo i ekonomično ostvare svoja prava.**

Neblagovremeno rješavanje predmeta u prethodnim godinama uzrokovalo je isplate značajnih iznosa javnih sredstava zbog utvrđenih povreda prava na suđenje u razumnom roku. U periodu 2014.-2018. godina, odlukama nadležnog suda, utvrđena je obaveza obeštećenja stranaka zbog povrede prava na suđenje u razumnom roku u iznosu preko **1,8 miliona KM na teret kantonalnih budžeta.** Posebno zabrinjava činjenica da broj utvrđenih povreda prava na suđenje u razumnom roku, kao i iznosi obeštećenja stranaka, bilježe stalni trend rasta.

Na osnovu rezultata provedene revizije **zaključeno je da općinski sudovi mogu unaprijediti efikasnost rješavanja predmeta, kako bi sa postojećim ljudskim resursima blagovremeno rješavali veći broj predmeta.** Unapređenje efikasnosti rješavanja sudskih predmeta doprinosi izgradnji sudstva sposobnog da pruži kvalitetne i blagovremene pravosudne usluge, koje zadovoljavaju potrebe građana i društva u cjelini.

Izvještaj revizije učinka dostupan je na web stranici Ureda za reviziju institucija u FBiH: www.vrifbih.ba.



GENERALNI REVIZOR

Dževad Nekić, dipl. oec.